

03 SEP 1998
LEAD Anwar-Pecat
MT UMNO PECAT ANWAR IBRAHIM

KUALA LUMPUR, 4 Sept (Bernama) -- Majlis Tertinggi (MT) Umno dengan sebulat suara memutuskan untuk memecat Datuk Seri Anwar Ibrahim daripada parti itu pada mesyuaratnya yang berakhir awal pagi ini.

Perdana Menteri dan Presiden parti Datuk Seri Dr Mahathir Mohamad mengumumkan keputusan itu kira-kira pukul 1 pagi selepas mesyuarat majlis itu selama hampir empat jam di ibu pejabat Umno di Menara Datuk Onn.

Anwar, yang dilucutkan daripada jawatan Timbalan Perdana Menteri dan Menteri Kewangan pada hari Rabu, menghadiri mesyuarat itu sebagai Timbalan Presiden parti. Pada mesyuarat itu beliau telah diberi peluang membela diri.

Dr Mahathir mengumumkan keputusan itu pada persidangan berita yang dihadiri oleh kesemua anggota MT yang hadir pada mesyuarat itu. Bagaimanapun Anwar tidak hadir pada persidangan berita itu kerana beliau diminta meninggalkan mesyuarat apabila keputusan akan dibuat.

"Persidangan media ini agak luar biasa sedikit kerana semua anggota MT hadir. Ini adalah untuk menyatakan pendirian MT adalah pendirian secara konsensus iaitu semua ahli MT menyokong keputusan tanpa kecuali," kata Dr Mahathir.

Ketika ditanya pemberita mengenai alasan-alasan Anwar dipecat, Dr Mahathir berkata beliau tidak perlu menyatakan sebarang sebab kerana ia adalah urusan parti.

Dr Mahathir berkata: "Keputusan itu diambil setelah Anwar diberi peluang sepenuhnya untuk memberi penjelasan terhadap tuduhan-tuduhan ke atas dirinya".

Semua anggota MT yang hadir pada mesyuarat malam tadi juga diberi peluang menyuarakan pandangan masing-masing sebelum undian dibuat.

Anwar meninggalkan mesyuarat itu 15 minit sebelum ia berakhir.

Sebelum meninggalkan mesyuarat Anwar telah menyatakan bahawa beliau tidak bersedia untuk menarik diri daripada parti dan bersedia menerima apa sahaja keputusan MT terhadapnya, kata Dr Mahathir.

Perdana Menteri berkata berikutan dengan pemecatan Anwar, jawatan Timbalan Presiden akan dikosongkan sehingga pemilihan parti tahun depan manakala jawatan Timbalan Perdana Menteri pula berkemungkinan besar tidak akan diisi.

Perdana Menteri yang berwajah serius sepanjang persidangan berita selama kira-kira 20 minit itu berkata, mesyuarat MT itu cuma membincangkan satu perkara iaitu mengenai masalah Timbalan Presiden.

Dr Mahathir berkata, beliau telah memberi penjelasan kepada MT berkenaan masalah itu dan mengapa badan tertinggi parti itu perlu mengambil tindakan yang sesuai dengan apa yang dilaporkan kepadanya selaku Presiden parti.

"Anwar telah diberi peluang sepenuhnya untuk menjelaskan terhadap semua masalah yang dibangkitkan dari segi pandangannya," katanya.

Selepas itu, para anggota MT diberi peluang menyuarakan pendapat masing-masing dan hampir semua mereka bersetuju Anwar harus menarik diri dari UMNO dan jika tidak beliau akan dipecat keanggotaannya.

Katanya, selepas itu Anwar diminta menyatakan pendiriannya dan beliau memberitahu MT bahawa beliau tidak sanggup mengundur diri daripada parti dan sebaliknya akan menerima apa sahaja keputusan.

MT memutuskan supaya Anwar meninggalkan mesyuarat itu dan Dr Mahathir meminta mesyuarat memutuskan sama ada masalah Timbalan Presiden diputuskan

secara undi sulit atau secara konsensus.

"Pendapat kita keputusan secara konsensus, sebulat suara Datuk Seri Anwar dipecat dari jadi ahli Umno," katanya.

Mesyuarat MT malam ini dihadiri oleh kesemua anggotanya kecuali Naib Presiden Datuk Seri Abdullah Haji Ahmad Badawi dan Tan Sri Muhammad Haji Muhammad Taib yang bercuti daripada jawatan Naib Presiden parti kerana sedang menghadapi perbicaraan mahkamah.

Dr Mahathir juga menyatakan bahawa beliau akan memangku jawatan Menteri Kewangan buat sementara waktu.

Ditanya mengenai dakwaan Anwar bahawa tuduhan terhadapnya merupakan konspirasi peringkat tinggi, Perdana Menteri berkata: "Itu adalah haknya untuk membuat dakwaan, beliau kena membuktikannya, saya fikir beliau akan diberi peluang dalam forum yang sewajarnya."

Perdana Menteri yakin para pemimpin dan anggota UMNO akan memberi penjelasan serta menenangkan rakyat mengenai perkembangan yang berlaku ke atas Anwar.

Ditanya sama ada pemecatan Anwar akan mempunyai kesan terhadap perpaduan parti, beliau berkata: "Saya fikir ahli-ahli akan lawan sikat dan akan tenang selepas itu."

Ditanya sama ada beliau sedih dengan peristiwa yang berlaku itu, katanya: "Ya, saya mesti katakan saya bersedih kerana perkara ini. Saya harap ia tidak berlaku pada waktu ini, ketika kita perlu bersatu bagi mengatasi masalah-masalah ekonomi (yang dihadapi negara) tetapi perkara ini telah menjadi di luar kawalan."

Menyentuh kemungkinan parti pembangkang memanfaatkan perkembangan dalam UMNO itu sebagai isu politik dalam pilihan raya, Dr Mahathir berkata: "Kita akan menghadapi apa juga isu dalam pilihan raya, pembangkang... yang tak ada pun diadakan, jadi kita tak hairanlah."

Ditanya sama ada perkembangan yang berlaku itu akan memberi kesan kepada Sukan Komanwel ke-16 yang akan berlangsung minggu depan beliau berkata: "Saya tidak fikir begitu."

Sementara itu, Anwar semasa bercakap kepada penyokongnya di luar bangunan Menara Datuk Onn selepas mesyuarat MT itu, berkata beliau tidak bersalah dan tidak bersedia untuk meninggalkan Umno atau meletak jawatan Timbalan Presiden.

"Saya tahu mereka akan terus mengaibkan saya melalui media tempatan, menghina saya, menuduh saya dengan pelbagai tuduhan yang paling dahsyat.

"Saya terpaksa lawan hingga ke akhir," katanya disambut pekikan dan laungan sokongan terhadapnya.

Anwar bagaimanapun menenangkan keadaan dengan meminta penyokongnya supaya membuka jalan dan memberi laluan dengan baik untuk membolehkan Presiden parti dan anggota MT yang lain berlepas pulang.

Setibanya di rumahnya di Bukit Damansara, di mana sekumpulan penyokongnya sedang menunggu, Anwar memberitahu mereka mengenai keputusan MT itu.

"Ahli-ahli MT menasihatkan saya supaya kalau boleh, undur diri secara terhormat untuk mengelakkan saya daripada dipecat sebagai ahli.

"Di peringkat akhir mesyuarat, saya jelaskan dengan baik, saya hormati pandangan tetapi saya tetap dengan pendirian bahawa tuduhan (terhadap saya) direka oleh pengkhianat kepada sistem keadilan.

"Oleh yang demikian, saya tidak ada pilihan dan saya menyerahkan kepada presiden supaya membuat keputusan dan saya tidak akan undur atau letak jawatan dalam parti," katanya.

Dalam beberapa afidavit yang difailkan di mahkamah tinggi semalam, Anwar didakwa terbabit dalam antara lain perbuatan sumbang, mengancam keselamatan negara, membocor rahsia negara dan menerima rasuah.

-- BERNAMA

ZKS AFY MNY RZS SJ NMO